

zween trewe gewisse Legaten oder Botschafft austrichten vnd abfertigen die inen/suchen/finden/auffwecken vnd herbringen sollen/Die heissen Johannes Euangelista/vnd Paulus Apostolus/Was gilts/Sie werden treffen vnd nicht feylen/Doch das du nicht vergessest/was ich droben gesagt habe. Ich wolle dis mal das furnemen/Wo der Ebreische text/sich gerne gibt vnd reimet/mit dem Newen Testamet/das solchs sey vnd sein solle/der einige rechte verstand der schrift. Alles ander/was Juden/Ebreisten vnd wer sie sind/nach irer zestiption vnd zemartern gezwungen Grammatica/da wider plaudern/sol vns gewislich eitel lügen sein.

Wolan S. Johannes fehet sein Euangelion also an. Im anfang war das WORT Vnd das WORT war bey Gott / Vnd Gott war das WORT/Dasselbige war im anfang bey Gott/Alle ding sind durch dasselbige gemacht/vnd on dasselbige ist nichts gemacht/was gemacht ist. Dis sind S. Johannis/oder viel mehr des Heiligen Geists rede / der alle ding lebendig macht/ Nu las sehen/ob er Mosen hie mit finden / vnd von Todten auffwecken könne. Denn Moses höret seer leise / vnd kompt frey daher vnd spricht. Die bin ich/Denn eben wie du Johannes vom Wort redest/So hab ich auch geredt